



Meeqqat ADHD-mik aamma autisme-mik nappaateqartut siusinnerusukku paasineqartarnissaannut qanoq pitsanngorsaasoqarsinnaaneranut pilersaarummik Naalakkersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq Mikivsuk Thomassen, Inuit Ataqtigiiit)

(Siullermeerneqarnera)

Meeqqanut ikiorsiinerit pigasuartuunngitsut timikkut aammalu tarnip pissusaat pillugu immikkoortortaqarfimmut innersuunneqarnermiit annerpaamik qaamat ataaseq ingerlasimanissaanik anguniagalimmik innersuussinissaq kisitsisilersuinissarlugu siunertaralugu tarnip pissusaa pillugu aammalu meeqqat timikkut nakorsiartarfianneersunik sukkasuumik suligasuartussanik suleqatigiissitaliornissamik Naalakkersuisut pilersitsinissaat siunertaralugu Inatsisartut aalajangiiffigisassaattut siunnersuut.

Suleqatigiissitap taamatuttaaq aningaasatigut sulisutigullu pisariaqartitat ersarissassavaat.

Suleqatigiissitap innersuussassat kisitsinerillu UPA 2023 nallertinnagu naammassisimassavaat.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Meeqqat ADHD-eqartut, ADD-eertut, autismeqartut aammalu/imaluunniit angstertut suussusersineqarnissaat taamaasillutalu ikiorsinnaanissaat qanoq pikkoriffiginerulersinnaaneritut tigussaasunik innersuussuteqartussanik suleqatingiinnik immikkut ilisimasalinnik pilersinnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

Suleqatingiit immikkut ilisimasallit innersuussutit 1. juni 2023 nallertinnagu saqqummiutissavai.

(Inatsisartunut ilaasortaq Nivi Olsen, Demokraatit)

(Siullermeerneqarnera)

Siunnersuuteqartunut tamanut qujanaq meeqqat mianernartumik inissisimasut unammilligassallillu ukkatarimmatigut.

Demokraatit isumaqarput, meeqqat tamarmik pitsaasumik toqqissisimanartumillu meerasariaqartut. Meeqqat tamarmik assigiinngitsuupput assigiinngitsunillu pisariaqartitsillutillu assigiinngitsunik unammilligassaqsinnaasarlutik. Taakkua piffissaatillugu akiornissaat pikkoriffigineruseriaqarluinnarparput. Akulikippallaamik meeqqat tamaasa sinaakkutinut assigiinnut naleqqussarniartarparput. Akerlianilli ukkatarineruseriaqarluinnarparput nikerarnerusumik sinaakkuusiinissarput, meeqqat inuunerissaarnissaat ukkatarineqartussanngorlugit meeqqat ataasiakkaat aallaaviginerullugit. Allatut oqaatigalugu piffissanngorpoq, meeqqap pisariaqartitaata pingaartinnerunissaa aqqissuussaanerup pisariaqartitaanit.



Ukiuni makkunani annertusisimaqaaq, meeqqaat amerliartuinnartut ADHD-mik, ADD-mik angstimik aammalu/imaluunniit autissemik suussusersineqartut. Tamanna akuerisariaqarparput ataqqillugulu. Taamatuttaarlu akuerisariaqarparput, meeqqanit taakkunanga amerlasuut eqqortumik ikiorneqarnermikkut pitsaasumik meeraanissaat pitsaasumillu inuuneqarnissaat. Iluqutaanngilarli, meeqqanut taakkununga ataatsimoorussamik iliuusissanik nassaarniaraluarutta. Meeqqat immikkuullarissuupput assigiinngitsuullutillu, unammillernartullu nalaatatik assigiinngitsumik aqqusaartarlugit. Taamaattumik ilimananngilluinnarpoq, meeraq autissemik nappaateqartoq meerarlu alla autissemik nappaateqartoq tapersorsorneqarnissamik assigiimmik pisariaqartitsisut.

Taamannak oqareerluni, ajoraluartumik suli imaattoqarpoq, meeraqarmat nappaataannik suussusersineqarsimannngitsunik, maannakkorpiaq paasineqaratik angalaartunik. Taamaattumik meeqqat taakku eqqortumik ikiorneqaratillu tapersorsorneqanngillat. Tamanna ajorluinnarpoq, taakkumi meeqqat eqqortumik tapersorsorneqarlutillu ikiorneqarunik pitsaasumik inuuneqarnissaminnut pitsaasunik periarfissaqarmata siunissamilu inuiaqatigiinnut akuulluarnerusinnaassallutik. Maannakkut meeqqat taakku paasillugillu ikiunngikkutsigit, annaariataarsinnaavagut, tamannalu ajuusaarnassaqaq.

Demokraatit maluginiarsimavaat, Naalakkersuisut marlunnik allannguutissatut siunnersuuteqartut. Erseqqissassavara allannguutissatut siunnersuutit siunnersuuteqanngilluinnarnermit pitsaanerummata, qularutigineqassanngilluinnarporli, siunnersuutaasimasut pingasut Inatsisartunut ilaasortanit Anna Wangenheim, Nivi Olsen aamma Mikivisuk Thomassen-imit saqqummiunneqarsimasut pitsaanerummata.

Paasinnilluta siunnersuutit Ilaqutariinnermut- Peqqissutsimullu ataatsimiititaliamut suliarisassanngorlugit innersuussutigaaqut.